

Awe ta cumpli 25 aña cu el a fayece

SHON A EMAN: ABOGADO DI PUEBLO



ORANJESTAD (AAN): Di-
avierna 13 di Juli 1967 Aruba
a worde conmovi pa e noticia
cu Shon A Eman a fayece di
ripiante. Diezdos dia promer
Pueblo a celebra hunto cune e
instalacion di e promer Bes-
tuurscollege cu solamente Di-
putado Arubiano. Un paso
importante pa Shon A cu
como hoben a entrega su fu-
turo pa Aruba por tabata tin
futuro.

Cornelis Albert Eman a
nace dia 17 di Mei 1916. E
tabata nieto di Cornes Eman
kende a cuminsa propaga e
pensamento cu Aruba mester
por a percura pa su propio
destino. Cornes Eman a
ehecuta varios proyecto na
Aruba y a pasa su idealismo
pa un Aruba autonomo den
Reino pa su yiu Henny Eman.

Tabata Henny Eman
kende a lanza e grito pa
"Seperacion" cu tabata encera

e anhelo mas profundo di
Aruba pa por bira un pais
autonomo den Reino Hulan-
des. Henny Eman a cuminsa
cu e accionnan di mobili-
zacion di Pueblo pa asina por
yega na separacion di Aruba
for di Antillas. El a mira cu pa
e causa di Aruba un partido
politico tabata necesario. Na
1942 el a funda Partido di
Pueblo Arubano AVP.

Pa Henny Eman "Seperacion"
tabata un lucha sagrado.
E lucha aki sinembargo tabata
tin mester di hendenan cu por
a pone e base legal pa por a
acerca Reino Hulandes.

Den e ambiente aki e
hoben Shon A Eman a lanta y
a escohe pa bay sigui estudi-
onan di Ley pa asina por a
sirbi su pais.

Na edat di 22 aña Shon A
Eman a finaliza su estudionan
como Abogado y a worde in-
scribi como Miembro di

Corte. E no kier a haci uso di
e posibilidadnan cu su estudio
tabata brinda pa bira un
Abogado famoso aunke su
aparicionnan den Corte tabata
demostra su capacidad como
Abogado. Shon A Eman kier
a sirbi su pais y su Pueblo te
extremo.

Shon A Eman a hiba su
lucha schouder na schouder
cu su tata Henny Eman kende
a yene cu un amor enorme pa
Aruba. Shon A Eman a trans-
forma su cas den e oficina di
AVP. Aki e tabata ricibi can-
tidad di hendenan cu tabata
bishita pa haya su ayudo. E
tabata yuda ariba tur tereno.

Necesidad tabata grandi e
tempo y hopi hende tabata
biba preta. Pa haya placa pa
yuda tur cu tabata acerke
Shon A Eman tabata fungi
como consehero pa algun
compania grandi.

Nunca rikeza a drenta su
cas pasobra manera placa a
drenta e tabata sali. Pero Shon
A tabata keda optimista.
"Dios lo yuda" tabata su
palabranan costumbra.

Shon A Eman tabata
conoce tur skina di Aruba y
tabata bishita e barionan di
mas isola pa scucha loke
tabata biba den Pueblo y
atende problemanan cu por
tabata tin. Su bida tabata
dirigi ariba su Pueblo y su
pais.

E lucha pa un Aruba liber
den Reino mester a worde
bon planifica segun Shon A.
E tabata e Abogado di Aruba
cu a prepara e defensa pa e
derecho di Aruba pa dicidi
ariba su propio destino. E
tabata e abogado di esnan mas
humilde y sin voz den Pueblo.
E tabata e abogado pa un fu-
turo nobo den cual Arubi-
anonan capacita lo a dirigi
nan pais. El a introduci y guia



hobennan den e arena politico
di Aruba. El a introduci cam-
bio di Ley pa baha edad di
vota di 23 pa 21 aña. E tabata
duna hopi importancia na
educacion y tabata boga pa
transportacion gratis pa
muchanan bay school y pa
mas beurs worde duna na
muchanan. Hopi hoben a
haya un beurs pa studia gra-
cias na e empeñonan di Shon
A Eman kende semper a boga
pa e identidad di Aruba nunca
bay perdi pero keda conserva.

Shon A Eman tabata
dedica atencion na tur loke
tabata pasa den comunidad y
na tur loke tabata tin di haci
cu su pais. E tabata Presidente
di Aruba Voetbal Bond y a
funda e Arubaanse Chauf-
feursbond. Tur loke tabata tin
di haci cu Aruba a haya aten-
cion di Shon A Eman mien-
tras e tabata sigui traha ariba
e asuntunan estatal pa asina
logra e anhelo grandi di
Aruba: un status separa den
Reino Hulandes.

Na 1946 el a entrega na La
Reina den audiencia especial
un peticion pa Aruba haya un
Gobierno propio den Reino.
Den seno di Reino prepara-
cionnan a cuminsa worde
haci pa e Conferencia di Mesa
Redonda cu a tuma lugar dia
18 di Maart 1948. Na nomber
di Aruba Shon A Eman a en-
trega na Reino un mocion pa
Aruba haya un "afzonderlijke
status" un status separa.

For di e negociacionnan

ariba tereno estatal na cual
Shon A Eman tabata tin un
aporte grandi a nace e Eilan-
denregeling cu a duna Aruba
un Gobierno Insular.

E lucha mester a sigui
segun Shon A. Documenton-
nan ta proba con den Staten y
na tur ocasion el a sigui bringa
pa Aruba haya su posicion
autonomo den Reino.

Dia Promer di Juli 1967
Shon A Eman a mira un di su
anhelonnan cumpli. Pa promer
bez den historia e Diputado-
nan cu a tuma asiento den
Bestuurscollege - forma pa
AVP y UNA/PIA/PRO tur
tabata Arubiano.

Shon A no a biba pa mira
su soño di un Aruba
autonomo den Reino
cristaliza. Dia 13 di Juli 1967
na edad di 51 aña el a fayece
di ripiente. Su morto a causa
un conmocion grandi na
Aruba.

Miles y miles di persona a
acudi na su entierro. Aruba a
yora morto di Shon A kende
nunca a busca ganashi per-
sonal. El a muri asina pover
cu Pueblo mester a lanta un
fundacion pa por a compra un
cas pa su viuda y ocho yiu nan
por a biba aden.

Shon A Eman tabata un
politico stima. Nan tabata
yame Defensor di Pueblo.
Defensor di Aruba. Amigo di
esnan sin Recurso y sin Voz.
Pero tur e nombrenan aki a
keda encera den e nomber cu
semper a acompaña Shon A
Eman: Abogado di Pueblo!

